

ENOA KE MANG NA?



U hlohonolofatsoe, moena. Ho monate haholo ho fihla tlung ea Morena.

² Ke a kholoa ke ne ke bala Lengolo, nakoana e fetileng, 'me Le itse mohla Jesu a ne a atamela Jerusalema, ha thoe barutuo ba ile ba lelala ba bonela motse o halalelang hole, eaba ba qala ba nyakkala ba re, ho re, "Joale na e be 'muso o se o tla busetsoa?"

³ 'Me monna enoa ea neng a bolela, kapa a bua ka leeto la morao-rao la Palestina, o re batho joale, selemo se fetileng, e sa le ba fihla tulong eo, 'me ha ba nyoloha phuleng 'me ba sheba mothinya oo, hona tseleng eo Jesu le barutuo ba e tsamaileng mohlang oo, ho thoe ha ba bona motse, ba qala ba lla.

⁴ Ua tseba, ke a kholoa, ntho e teng eo barutuo bao, matsatsing ao, ba e utloileng, hore—hore 'muso o tla busetsoa hape.

⁵ 'Me joale nako e batla e fihlile. 'Me ke lumela maikutlo ona ao a arubelitse batho, ho tjhoe 'muso o se o tla busetsoa hape.

⁶ Moena Neville, molisa oa rōna homme ea bokoang le ea mosa, o sa tsoa qoqa le 'na ka morero oa tsoseletso e tla tšoaroa mona tabernakeleng, masiung a 'maloa, ho e rapella. 'Me ka 'molella, ka e hopola e tla ba ntho e bokoang.

⁷ Le ke ke la tšoara litsoseletso tse ngata haholo. 'Me hangata re nka mohopolo o phoso oa tsoseletso. Tsoseletso hakaalo ha se ho nokela litho tse ncha, empa ke ho tsoseletsa seo re nang le sona. 'Me ke a . . .

⁸ Ke rata ho bolela sena, ka ha ke e bua ho tsoa botebong ba pelō ea ka. Ke qala ke fumana maikutlo a fapaneng tabernakeleng a kileng a boba ka nako e telele, e leng maikutlo a—a boikutlo bo tebileng ba moea, a kileng a boba mehleng, khale koana nako e fetileng; ntho eo e lulang, 'me e na le motheo oa mannete. 'Me ke tšepa Molimo a tla hlohonolofatsa kerekana ena, le . . . ? . . . ka matla a eona hape.

⁹ 'Me ke bona lenaneo le tsوءetseng la kaho, 'me ke nahana e le ntho e khōlō. Hoba, kapele kapa hamorao, rōna batho ba holileng re tla hlobola lihlomo re li behe matsohong a bana ba rōna, re ntano nyoloha Mothati oo oa gauta.

¹⁰ Ke feticile tšoao leo le bohareng tsatsi le leng joale, la lilemo tse mashome a mahlano. Ke batla ke sa eelloe taba eo. E ka re ha se khale ha ke khannela Chris Meisner likorosari, lilemong tse leshome le metso e robeli, tse leshome le metso e tšeletseng, tse leshome le metso e robeli. Empa e le ho ea nqa e 'ngoe feela. Ho a bontša hobane mona ha re na motse o tieang, empa re batla

O tlang ho hlaha. 'Me ke Motse moo Molimo e leng mohahi, 'me mono bofelo ha bo sa tla ba teng.

¹¹ Hoseng hona, ha ke ntse ke bua ka temana ea letsatsi la 'mè, 'me ke leka ho hlomamisa 'mè e seng ka maemo a hae ruri, ka lilemo tsa boqheku, ka mashoebe, le ka sena sohle, melangoana ea hae, kapa ka setulo sa khale sa bakuli, kapa ka setulo se ikokotlelang, le ka nkhoana ea lipalesa lephakong la hae; empa 'mè koana tsohong, a buselitsoe bocheng'ba hae, 'me a eme, a phatsima joaloka mofumahali. Ke rata ho nahana joalo ka 'mè oa ka. Ha ke rate ho mo nahana maemong a hae a kajeno, a tsorfetse. Ke rata ho nahana ka ntho e tlang ho hlaha. 'Me ke a tseba le lôna le ikutloa joalo ka bommè ba lôna. Le mo nahana kamoo a leng kateng pelöng ea hae. Leha koana ba bangata . . . joalo ka seroki ha se bolela, "Bophelo ba hae ha bo phollatsi, empa o tla boela a bo phela, e le feela ho u etsetsa se seng." Molimo o tla mo etsetsa mokhoa oa ho phela le uena ka ho sa feleng. Ke thabetse hoo feela.

¹² Ha ke tsebe lebaka, ke tsebisitse sena, hoseng hona, hore ke tla bua bosiung bona, ha Morena a ratile, ka: *Enoa Ke Mang Na?* Ruri ha ke tsebe ebe ke tla e khona joang. Empa e sa le ke phathahane fihlela hora le metsotso e leshome e fetileng nka rialo, ke kenetse likōpano tsa sephiri thapama eohle, le ho kenela lintho tse ikhethang le—le mehala ea tsohanyetso. Ha ke a khona ho e finyella.

¹³ 'Me ke batla hore le tsoelepele ho rapella Ngaka Sam. O—o ntse a tsoella hantle, 'me re a leboha. Le Ngaka Baldwin le Mof. Baldwin bobeli ba ntse ba hlaphoheloa. Ba tsoella hantle.

¹⁴ Ke batla le ngole e ncha lenaneng la lôna la thapelo, thapama ena. Ke ea Harry Lease tlase mona, rameriana. Harry ke motsoalle oa ka. 'Me ho tloha ke mo tsebile, e sa le ke mo nka e le Mokreste, ho fihlela thapama ena, ha moena oa hae a mo etsetsa kôpo ea pholoso ea moea oa hae. Moena Mike Egan o tlile le . . . teraseti ea rôna mona, o tlisitse litaba tseo. 'Me Harry o maemong a mabe, kantle koana kokelong. Ha ke a mo nahana a nkuka hakaalo; empa, o latoletse molisa oa hae, thapama ena, kapa molisa oa kereke a e tsamaeang, 'me o batlile hore ke tl'o 'mona. 'Me ke batla ho ea 'mona. Ka baka leo, le rapelle Harry.

¹⁵ Re thabetse mona, bosiung bona, ho bona, metsoalle ea ka mona, e tsoang tlase Georgia, Moena Welch Evans le lelapa la hae. Ke bona, hape, baeti bao ke sa ba tsebang, mohlomong ba ne ba tlile hoseng hona.

¹⁶ Haeba ke sa fose, ke bona Moena le Khaitseli Elmer Collins morao mane, ho tsoa Phoenix, Arizona. Oh, ha le e-so fetohe. E ka re le tlameha le be le apere liaparo tsa lôna tsa seporo sa terene, 'me—'me le kena le tsoa seporong. Le amohetsoe hape lapeng! Nke ke ka le kôpa ho lula mona, hobane le fumane tulo

e ntle ho feta, le a bona, e khabane haholo, Phoenix. Nka rata ho lula mono, tsatsi le leng, ka bona.

¹⁷ 'Me ke bona Moena Smith mona, oa kereke ea Molimo, ka ntle mane. Moena Smith, ke neiloe, bukana ea hao, letsatsi le leng, kapa maobane thapama, ho se ho phirimile. Ha ke e-so e bale, empa ruri nka e khothaletsa, ha feela ke e tseba e ngotsoe ke uena. E tlamehile e be e lōkile, e le Lengolo la 'neta. Molimo a u hlohonolofatse. 'Me ke a tšepa e tla atleha.

¹⁸ Le ba bangata, nka rialo. Bohle le amohetsoe mona tabernakeleng. 'Me ke nafetfetsoe ke sefela seo, hoseng hona, seo Khaitseli Stricker a se binneng, "O mo shebile, ka ditralisi." Baena besō ba Mennonite mona, ke thabo ha ba le teng. 'Me, oh, lōna bohle! Motsoalle mona, ke a lumela, ea tsoang Illinois, mora oa hae o ntse a hatisa ka morao, ho kōpana le bona hape. Le ba bangata hakana, nka tšoha... Le se ke la nahana hore ke a le koekoetla ha ke sa bitse lebitso la hao, empa ke le amohela kaofela ha lōna.

¹⁹ Joale a re baleng bosius bona, bakeng sa thuto ea Lengolo, ho tsoa khaolong ea Mattheu 21, ho qala ka temana ea 1, le ho bala re theoha, ho kenyelotsa ea 11, hammoho.

*Eare ha ba atametse Jerusalema, eaba ho fihla teng,
'me ba fihla Bethefage, thabeng ea Mohlooare, Jesu a
roma barutuo ba le babeli,*

*A re ho bona, E-eang motsaneng oo le o lebileng, etlare
le sa fihla le tla be le fumane esele e hölehiloeng, e nang
le petsana ea eona: le li lokolle, 'me le ntlisetse tsona ho
'na.*

*Etlareha motho a le botsa taba, le tle le re ho eèna,
Morena o ea li hloka; 'me o tla phakisa a li romele.*

*Hoo hohle ho entsoe, hore ho etsahale ho boletsoeng
ke moporofeta, ea itseng,*

*Bolellang...barali ba Sione le re, Bona, Morena oa
hao ke eo ea tlang a le mosa...a kaletse eona esele,
petsana ea esele e lemaletseng joko.*

*Ebile barutuo ba ea, ba etsa kamoo ba laetsoeng
kateng ke Jesu,*

*Ba tlisa esele, le petsana ea eona, 'me ba ala liaparo
tsa bona holim'a eona, 'me a e kalla.*

*Bongata bo boholo ba ala liaparo tsa bona tseleng; le
ba bang ba rema makala a lifate, ba ale tseleng.*

*'Me boholo bo eteletseng pele, le bo latelang, ba hooa,
ba re, Hosanna ho mora Davida: Ho bokoe ea tlang ka
lebitso la Morena; Hosanna maholimōng a holimōlimō.*

*Eitse ha a kena Jerusalema, motse ohle oa hooreana,
oa re, Enoa ke mang na?*

*Matšoele a re, Ke Jesu moporofeta ea tsoang
Nazaretha...*

A re inamiseng lihlooho tsa rōna bakeng sa thapelo.

²⁰ Oho Morena, re ipotsa seo re ka beng re se buile, holane ra phela matsatsing ao. Empa re phela letsatsing le fetang ka boholo, mohla re shebileng ho khutla ha Hae. 'Me e re re sa itlophisa, Morena, ho hlophisa lipelō tsa rōna, re bokella mangata a bokhoni ba rōna masimong a kotulo, lapeng la rōna le mose koana. Re ntse re hopotse re—re lebeletse mohla re tla bona ho hlaha ha Hae, a kaletse pere e t̄soeu, ho tsoa likhorong tsa Khanya, ho fetola le ho bopa mebele ena ea rōna ea khale e bolang, ho e etsa joaloka 'mele oa Hae o tlottlehileng, moo sebe kapa pontšo ea lefu e sa tlong ho kena le ka mohla. 'Me re tla Mo bona kamoo A leng kateng, re phele, re Mo rate ka mengoaha eohle e tlang ho latela.

²¹ Re U leboha ka kereke ena le ka molisa oa eona, le ka diteraseti le ka batikone, le ka motho ofe le ofe ea tlang koano; le ka baeti ba menyako ea rōna, e leng linku tsa mohlape o le mong, li mpa li tsoa lesakeng le leng. Re U kōpa ho ba hlohonolofatsa, bosiung bona, ka Sefahleho sa Hao.

²² Re fepe ka Lentsoe la Hao, re tle re tlohe mona, bosiung bona, ka maike misetso a ho ba Bakreste ba molemo ho feta pele le ka mohla. Re tlohe ka t̄sepo e ncha pelōng ea rōna, le ka thabo, ho emela ho Khutla ha Hae.

²³ Ba bang ha ba t̄soha ba le teng har'a rōna, ba kulang le ba hlomohileng, re ke ke ra lebala ho ba rapella. Hore ba... Ho kena mohahong, bosiung bona, moo re phuthe hileng ho rapela, ho kena, ba kula, ba tsoe ba hlaphohetsoe.

²⁴ 'Me re kōpela ba ntseng ba ntlafala, malapeng le likokelong, ba liphateng tsa mahlomola. Re a rapella, oho Molimo, mohau oa Hao ho ba finyella.

²⁵ Re batla ho rapella ba monyemo, bosiung bona, ba e-song ho latsoe le ho bona hobane Morena o monate, ba sa tsebeng ho ratoa ke Molimo ho bolelang. Ha ba utloisise seo ba haelloang ke sona. Oho Molimo, khaso e itseng ea radio, kapa mokhoa o itseng, o ame lipelō tsa bona, 'me maikutlo a bona a sokolleloe ho Uena pele monyako oa mohau o koaloa o khahleloa, ho ema kahlolong ka ntle ho mohau.

²⁶ Re thus, Morena. Lintho tsena re li rapella ka Lebitso la Morena Jesu, re li kōpela khanya ea Hae. Amen.

²⁷ Batho ba ne ba phuthehile likhorong, le literata li hatellane, le batho ba se na moo ba robalang teng. Ba ne ba robetse ka ntle ho lerako, litšeng tsohle, hobane ena e ne e le paseka. 'Me batho ba hlahile ka makhalo ohle a lefatše le tsebjoang, ho rapela nakong ena. E ne e le mohla ho hlabjoang konyana ea paseka. 'Me e... E ne e emetse toelo ea bona Egepeta, kholeho. 'Me ba

ne ba tšoara hona, selemo se seng le se seng. Selemo se seng le se seng, paseka e khōlō ena e ne e tšoaroa. 'Me e le e 'ngoe ea linako tse tsoileng ka mahetla tsa . . . kapa liketsahalo tsa tumelo ea Bojuda, hobane e buile ka mohla ba tla lokolloa.

²⁸ Batho bohole ba rata ho nahana joalo, mohla ba neng ba lokolloa. Kamoo e mong le e mong oa rōna, bosiung bona, a ka khutlelang morao mohla re neng re lokolloa! Seo e se lekantseng ho rōna!

²⁹ Ke hopola boiphihlelong ba ka, mohla peloana ea ka e futsanehileng e neng e lakatsa ho ama Molimo. Ka nahana, "Oh, hola nka nyoloha ka kokota monyako oa Oona, le ho buisana le Oona nakoana!" 'Me, ehlile, le tseba pale ea ka. Ke ile ka tšoara pampiri le pensele, ke tla O ngolla lengolo, ka ha ke sa khona ho buisana le Oona. 'Me ke O tsebile a phela merung, hobane ke O utloile, 'me ke O bone o tsamaea merung. 'Me e—e tselana e ikhethang, ea tlaoelo eo ke tsamaileng ho eona ha ke tsoma kapa ke ea tšoasa lihlapi. Ke ile ka nahana, "Ke tla le hloma sefateng feela, ke le ngolle Mongh. Jesu." Mokhoa o ikhethang oo feela ho imolla moroalo oo pelōng ea ka.

³⁰ Oh, bosiu boo, tlase koana! Nka lebala lilemo tsa ka, mohla o mong nka tšoha ke lebala lebitso la ka, empa nke ke ka lebala hora ea mohla O nong o ntokolla sebeng. Ntho e ile ea etsahala, tlase ka hare, e nthusitseng lihoreng tse khōlō tse lefifi. Hora ea tokollo ea ka, maima a sebe a ile a ntlohela, 'me ka ba motho e mocha. Ke fetohile 'mopua e mocha ho Kreste Jesu, e sa le le mohlang oo.

³¹ 'Me Bajuda bana, ba nyolohile, selemo le selemo. 'Me ho ne ho hlonngoe e—e seliba ka har'a kereke. 'Me ba jele e—e bohobe, le meroho e babang, le konyana, 'me ba nositsoe selibeng sena ka har'a kereke. 'Me ba nyakaletse 'moho hobane Molimo o no o ba rekolohetse. Ka hona, ena e ne e le nako ea paseka, 'me e se nako ea paseka feela, empa e le paseka e ikhethang.

³² Le a tseba, ka linako tse ling re ea kerekeng 'me . . . Re rata ho ea teng ka mehla, empa ka linako tse ling ho etsahala ntho e ikhethileng.

³³ Ena e le e 'ngoe ea linako tseo. Sebaka se ne se kakatletse tebello, ho itšoanelia le kajeno. Mahlo a bohole ba neng ba Mo rata a ne a Mo shebeletse ho kena khorong.

³⁴ 'Me ke hopola haholo ho le joalo kajeno, ho bao ba Mo ratang 'me ba Mo lebeletse. Sebaka se kakatletse tebello.

³⁵ Athé, re phela letsatsing lena, mohla lefatše ka tšoanelo, le fetohileng khaketlana ea phoofo. 'Me mahlale a re bolella, "Ke metsotso e meraro feela pele ho khitla ea bosiu." 'Me ke a kholoa le balile, joaloka 'na, letsatsi le leng, pale eo ea mogenerale enoa oa sesole, ea itseng, ha thoe, "Ntoa e 'ngoe ha e ka tsoha e hlaha, e tla tiisetia metsotso e 'meli feela kapa e meraro." Matsatsi a khale a ntoa, a ho thunya lithunya, a ho cheka mekoti ea

liphokojoe, hoo hohle ho fetile. Ho thoe ntoa e latelang e tla tiisetsa metsotso e 'meli kapa e meraro feela. Ka tsatsi le leng, motho e mong ea hlakaneng o tla phatloha hlooho 'me a tsoibile e 'ngoe ea libomo tseo. 'Me ha ba etsa joalo, re hloaile litsebe, hohle, ho boela re khutlisa re thunya hape. Lefatše le ke ke la e phema.

³⁶ E mong le e mong o tsebile hoba ntho e itseng e tla hlaha ka paseka, feela ha ba tseba eng.

³⁷ 'Me ho a tšoana le kajeno. Mang le mang o tseba ntho e 'ngoe e le mothating oa ho etsahala. E mong le e mong o tseba seo. U ka qoqa le moetsalibe, u ka qoqa le mohoebi, u ka qoqa le mang le mang, 'me, oh, ke mehleng ea lefatše le tsila-tsilang.

³⁸ Empa u ka qoqa le monna kapa mosali ea shebeletseng ho khutla ha Hae, 'me khanya e tšoelima sefahlehong sa bona, e a phatsima. Ba shebeletse ketsahalo e khōlō eo. Ka baka leo sebaka sohle se boetse se mahlahahlaha, ho lebella ntho e tlang ho etsahala. Lefatše ha le tsebe se mothating oa ho etsahala, empa Kereke ea Molimo o phelang e tseba se tlang ho etsahala. Ba tseba terompeta e tla lla kapele, 'me re tla 'Mona a e tla, a tsoa Khanyeng, a kaletse pere e tšoeu, le makhotla a Leholidō a Mo latetse. 'Me ba shoetseng ho Kreste ba tla hloibiloa 'me ba nkoue ho kōpana le Eèna sebakeng. Ke sona seo re se shebeletseng. Re a se lakatsa.

³⁹ 'Me ha re bolelloa meeaa ea bommè bao, le bao ba joalo, eo re buileng ka eona hoseng hona, tlas'a aletare ea Molimo feela, e ntse e hooa, "Ho tla ea ha kae, Morena? Ho tla ea ha kae?" 'Mè o batla ho u bona hakaalo ka ha u batla ho 'mona. 'Me baratuoa ba rōna ba batla ho kōpana le rōna hakaalo ka ha re batla ho kōpana le bona.

⁴⁰ E tla ba kōpano e kakang, mohla A tlang! Ho teana le baratuoa ba rōna le ho ba bona ka 'mele oa bona o tsositsoeng, le o tlotsitsoeng, le ho tsamaea le mojalefa oa tsoho, ho boha semelo sa bona, kamoo se fetohileng, ka bonolo le ka khutso. 'Me ha e sa tla ba lehlanahlana le lehlaphahlapha, le ho qhomaka le ho rutla, hoba re tla phela 'moho ka Bosafeleng.

⁴¹ Oh, mongoaha o moholo ona oa methapo oo re phelang ho ona, ha ho nako ea ho etsa letho, ke ho hloa feela, le ho rutlaka, le ho phamola, khèle, ke letsatsi le nyarosang.

⁴² Hape, eare ba sa emetse ntho ho etsahala, ho hobe ha bongata bo etetseng paseka bo sa ka ba 'Mona. Koana, ba tsebile ntho e le mothating oa ho etsahala, empa ha ba khona ho 'Mona.

⁴³ Ho tla ba joalo ho Khutleng ha Morena. Batho ba tsila-tsilang ba bangata, kajeno, ba tseba ntho e le mothating oa ho etsahala, empa ba—ba ke ke ba 'Mona le ka mohla. Hoba O tla fihla khitla ea bosiu ha ho khutsitse, ho nka Kerekana eo e labalabelang le e lebeletseng ho 'Mona. Ke bona bao A tlang ho ba tlela le ho ba tlosa. Ba bangata ba lefatše ba phelang

ka menyaka, 'me ba jesa meeaa ea bona lintho tsa lefatše, ba ke ke ba tseba se hlahileng, ho fihlela Kereke e tsamaile e kene Khanyeng, hoba O tla fihla se sa lesholu la bosiu 'me a ba tlose. Re ka bona hobane re khutletse hona tulong eo. Joale re a fumana, hoba, litebello tsena, ho re Molimo o tla ho bao ba... Hohle Mangolong, e sa le ho lutse joalo. Hore bao ba... Kamehla O hlahaela ba Mo lebeletseng, kamehla bao ba batlang ho 'Mona. 'Me ke tšepa e le eona tšepo e hahileng lipelōng tsa rōna bosium bona.

⁴⁴ Ho se ho batla ho fetile likhoeli tse tšeletseng, ke a kholoa, ha ke ntse ke pakela batho ba itseng. 'Me ke itse, "Oh, ho e nahana, A ka tšoha a fihla nako efe feela!"

⁴⁵ 'Me se nqositseng ho rialo, ke ne ke qoqa ka Moena Bosworth. Mohla ke etetseng mohalaleli eo oa khale, mohlang oo re utloetse hobane o a shoa, lilemong tse mashome a robeli le ho hong, ra theohela teng 'na le mohatsa ho... mono ho 'mona pele a eshoa. Ke ne ke tlameha ho qoqa taba le eèna. Ke rata ho shebella bahalaleli ha ba kena Khanyeng, 'me ka tlameha ho 'mona. Ka lebelo le chesang lithaere tsa koloi.

⁴⁶ Empa ha ke fihla mono, ke itšohlometsa monyako, ke ha mopatriareka eo oa khale a robetse koung ea phaposi. Ha a mpona ke etla a phahamisa hlooho ea hae. Liphakana tsa hae tse tsofetseng, tse tšeremang li leketlile, nama e leketlile. 'Me a 'nanabela ka liphaka tsa hae. 'Na ka mo phamola ka molala ka hooeletsa, "Ntate oa ka, ntate oa ka, makoloi a Iseraele, le bapalmami ba ona," hoba e ne e le monna oa mohalaleli, ea lokileng.

⁴⁷ 'Me ka re, "Moena Bosworth, ke batla ho u botsa taba. Na u lumela hobane u tla hlaphohelo?"

A re, "Oh, ebile ha ke kule."

Ka re, "Be, molato ke'ng?"

⁴⁸ A re, "Ke ea Lapeng." A re, "Ke khathetse, 'me ke felile matla. 'Me ke batla ho ea Lapeng feela."

⁴⁹ Ka re, "Ha ho le joalo u a lemoha hobane u a shoa?" Ka re, "Ke batla ho u botsa taba. Motšeо koana boselebetsing ba lilemo tse mashome a supileng le ho hong, motsotso oa hao o khanyang ho fetisia ke ofe? Na u ka mpolella, monghali, ua mpolella boiphihlelo ba hao, tseleng ho theoha, moo u ka balang hora ea hao e khölöhali."

⁵⁰ Ha nka phelela ho bona lilemo tsa hae, nke ke ka lebala le ka mohla, ea re ha mahlo a lefifi ao a ncheba, holim'a liborele tseo. A re, "Moena oa ka ea ratehang, ona ke motsotso o moholohali bophelong ba ka. Ha ke hopole nako e khanyang ho feta hona joale."

⁵¹ Ka mo shalima sefahlehong, 'me ka re, "Monghali, na u sa ntse u tseba hobane u a shoa?"

⁵² A re, “Moena Branham, ke robetse mona, ke Mo emetse ho bula monyako oo motsotso o mong le o mong le ho fihla, ho nkisa Lapeng le Eèna.” Ke oo mokhoa oa ho shoa. Ke oo mokhoa oa ho tsamaea.

⁵³ ’Me joaloka ha le tseba, hoo, lihora tse peli pela a eshoa... O ne a kene, a robetse a ilibane, matsatsi a mabeli. ’Me hoba a iphumane, a phahama ka phaposing, a qala a buisana le mohatsae. Eaba, hang feelsa, ea ka o a bonaletsza. ’Me a tsukutla matsoho, hora e tletseng kapa ho feta, le metsoalle, e sa le e hlokahala lilemong tse mashome a mane kapa mashome a mahlano tse fetileng, ea basokolloa kerekeng ea hae. A tsukutla ’mè oa hae le ntate ka matsoho. Ho fihlela a... bophelo bo tsoile ’meleng oa hae, ho robala mosamong eaba o a robala, liphakeng tsa Morena Jesu. Ha ho ntho e joaloka ho Mo sebeletsa, ho Mo lebella.

⁵⁴ ’Me ha ke ntse ke qoqa le monna enoa ka taba ena, a ntse a pheta boiphihlelo boo, ka bua sena. Ka re, “Monghali, oh, na ho ke ke ha babatseha mohla re ’Monang? Oh, hola A ka fihla kajeno!”

A re, “Moena Branham, u se ke ua tšosa batho joalo.”

Ka re, “U bolela’ng?”

⁵⁵ A re, “Oh, u se ke ua leka ho bolella batho hore lefatše le tlil’o, kapa Kreste o a tla. E a ba tšoenya.”

⁵⁶ “Oh,” ka re, “che. Ke kōpa tšoarello. Bao ba Mo shebeletseng, ke litaba tse khanyang ka ho fetisa tseo ba ka li utloang, ho thoe Jesu o mothathing oa haola le ho nka Kereke ea Hae.” Botsofali bo tla fetoloa bocha. Thabo e tla lula litulong tsa tšarelo. Bophelo bo tla lula litulong tsa lefu. Ho se bole ho tlatse litulo tsa boitšoaro, bo tla fetoloa. Oh, motsotso o mokakang, ho tseba hobane O tla khutla!

⁵⁷ Ba ne ba Mo shebeletse. Ba ne ba Mo lebeletse. ’Me mohla A fihlang, re fumane maquloana a mabeli. Sehlopha se Mo emelang, le se khahlano le Eèna.

⁵⁸ ’Me le kajeno re fumana hona hoo. Ke eona taba, ho khutla ha Hae, kamehla ho arola batho. Nako e ’ngoe le e ’ngoe, ha u fumana Jesu, u fumana ba emang khahlano le Eona. Ke Satane. ’Me, kajeno, ha re e nahana, ha re bone phethoho e kaalo. Ho itšoanelia feela. Batho ba fetohile, empa moea oa batho ha o e-so fotohe.

⁵⁹ Qetellong ha ba sheba khorong ba ’Mona a hlaha, a kaletse nthoana eo, esele e tšoeu, ha ho makatse ha barutuo ba qalile ho—ho hooeletsa, “’Muso oa Leholimō o tlile!” Batho ba matha ho Mo khahlanyetsa, ’me Jerusalema eohle ea hoereana. Ntho e teng ka eona, ha Jesu a fihla, kamehla e a hoereanya. ’Me motse ohle oa hoereana. ’Me ha ba—ba khone ho e pata.

⁶⁰ 'Me bareri ba letsatsi leo ba ile ba tlameha ho arabela lebaka la phulueho ena, hobane e le ka mokete oa paseka. 'Me ba hoeletsa, "Enoa ke Mang na?" mohla sebaka se ne se chachehile. 'Me ho fihla ha Morena Jesu, Jerusalema, ho ne ho chachehisitse sebaka ka litebello. Ea ka baruti ba tlamehile ba be ba tsebile se neng se tla hlaha. Ea ka moprista e moholo o tlamehile a be a e tsebile. Ea ka baprista ba bang bohole ba tlamehile ba be ba e tsebile.

⁶¹ 'Me ha e a fetoha ka letho, kajeno, hoba Moea o Halalelang o lelekela ho Khutla ha Morena Jesu. 'Me Moea o Halalelang o qala o phatlalla bophareng ba lefatše, mello ea tsoselsetso e ropohile, hohle, ho entsoe lipontšo tse khōlō le meeka, lipholiso li entsoe, liporofeto li tsoile. Mahlohonolo ohle a boapostola a khutletse ho Kereke. Ka baka leo, joaloka mohlang oo, ho a tšoana le joale, moea oa mosalumele o sa ntse o hoeletsa, "Enoa ke Mang na?"

⁶² Ba bang ba bona ba lumetse ho Morena Jesu, ha thoe E ne e le monna ea lōkileng. Ba bang ba bona ba itse, "Ke Monna ea lōkileng."

⁶³ Ke seo ba se buang kajeno. Ba leka ho Mo hlopholla e le Napoleone, mohlabani. Ba leka ho Mo hlopholla joaloka e—e George Washington, monna ea nang le 'nête. Empa O ne a fetisa le hoo.

⁶⁴ Na le lemohile palo ea Lengolo? Ba itse, "Enoa ke moporfeta ea tsoang Galelea."

⁶⁵ 'Me kajeno ba leka ho rialo, ha ba bona khato e khōlō ena ea Morena: ho khutlisetsoa, 'meleng o koenneng, bakuli le ba mahlomoleng; ho 'Mona a sabelisa Moea oa Hae ka Kerekeng ea Hae, ho lemoha mehopolo ea batho; ho 'Mona a etsa kamoo A entseng mehleng ea Hae lefatšeng mona, ho phethisa seo A boletseng se tla etsahala. Ruri. Likereke le batho, li ntse li botsa sena, "Enoa ke Mang na?"

⁶⁶ Ha ba ka ba utloisia Jesu e ne e le mang, hoba A sa eleloa ke ofe oa bona, ka likolo tsa bona. "Ebe O tsoa seminareng efe? Ebe O tsoile sekolong sefe sa thutabomolimo?"

⁶⁷ 'Me ho a tšoana le kajeno. Batho ba bangata ba tlotsitsoeng ka Moea o Halalelang ha ba tsoe seminareng efe. Ke lihlahisoa tsa khetho ea Molimo ka seqo. Empa lipontšo le meeka, le mehlolo e tsepisitsoeng ke Bibele, li teetse Moea o Halalelang ona o moholo hare ha O ntse o tsamaea har'a batho.

⁶⁸ 'Me kajeno ba re, "Ebe ba tsoa sekolong sefe?" Hang feela ha u kena motseng, ho tšoara tsoselsetso, "U setho sa bolumeli bofe?"

⁶⁹ Ke ne ke kenetse lipuisano Labohlano thapama, le moprista oa Roma e Katolike ea tsoang kerekeng ea Irishi ho la Louisville. 'Me ka potlako hoba ke tsebisoe moithuti ea khabane, oa sekolo, a re, "Mongh. Branham, u setho sa bolumeli bofe?"

Ka re, "Ha ke ikamahanye le bofe."

'Me o itse, ka hona, "Na u hlomamisitsoe?"

Ka re, "E, monghali."

A re, "U hlomamisitsoe ke mang?"

⁷⁰ Ka re, "Morena Jesu o mphile Moea o Halalelang, ho bolela Evangelī, ka ba ka fuoa thomo." Be, ke eona hlomamiso eo re e hlokang.

⁷¹ Jesu ha e-so bolelle barutua ba Hae, "Tsoang le kenele . . ." Ha ke seholle lintho tseo, empa li phetse 'me letsatsi la tsona le liketse. Ha A re, "E-eang, le ithutele boreri, lilemo tse ngata *hakana*."

⁷² O itse, "Le eme motseng oa Jerusalema, le tle le be le tlatsoe ka Matla a tsoang Holimō." O e boleletse banna ba sa khoneng ho tekena lebitso la bona. "'Me ka morao ho tsena, hoba Moea o Halalelang o theohele ho löna, le tla ba lipaki tsa Ka, Jerusalema, Judea, Samaria, le ho isa lipheletsong tsa lefatše." Ke eona hlomamiso.

⁷³ Ha re fumane tlaleho moo Jesu a keneng sekolo sefe, kapa hona ho apesoa ke liseminari life. Koana, liseminari tse hahetsoeng Lebitso la Hae li fetisa ka bongata, morerong oa borapeli, ho feta ntho efe—ntho efe e kileng ea ba lefatšeng. Ha re e-so fumane rekoto efe—efe e Mo porotang a kile a kena sekolo. Empa, koana, feela likolo tse hahiloeng ka Lebitso la Hae li fetisa lebitso la mofuta ofe le leng teng tlas'a maholimō, likolo. Ha re Mo tsebe a kile a ngola buka. Koana, libuka tse ngotsoeng ka Eèna li fetisa lingoloa tsohle ke kileng tsa ngoloa. 'Me, kajeno, Bibele ea Hae ke Buka e tummeng ho fetisa life tse leng teng lefatšeng lohle, har'a lingoloa tsohle.

⁷⁴ Empa, le a bona, mohla letsatsi leo la ketelo, ba hoelelitse, "Eo ke Mang?"

⁷⁵ Le a bona, Molimo o nka ntho e bonahalang e se letho, ho etsa ntho e itseng ka eona. Ke sona se Mo etsang Molimo.

⁷⁶ 'Me hoba ba 'Mone a hlaha, a kaletse a kena khorong, ba bang ba bona ba itse, "Ke Monna e moholo."

⁷⁷ Ba bua joalo kajeno. Li teng likolo tsa thutabomolimo tse rutang, kajeno, ho thoe Jesu e ne e le Monna e moholo, ho thoe E ne e le Monna ea lòkileng. Esita le ba bang ba bona ba re E ne e le moporofeta. Joale, efèla haeba E ne e le moporofeta feela, leha e le Monna ea lòkileng, re sa le libeng tsa rōna. E ne e le Ea fetisang le moporofeta. E ne e le Ea fetisang Monna ea lòkileng. Koana, E ne e ke Monna ea lòkileng. Koana, E ne e le Molimo-Moporofeta. Empa O ne a fetisa moo. E ne e le Molimo o bonahetseng ka nama, ho tlosa sebe.

⁷⁸ 'Me eitse ha A fihla, a kena a kaletse, batho ba bangata ba itse, "Ke mofolisi. Oh, re 'Mone a tutubolla mahlo a sefofu. Re

'Mone a tsamaisa monna oa seritsa. Re 'Mone a rapela, feberu ea ba ea tlohela ngoana." Empa, hape, mofuta oo o ne o Mo latetse ka baka la mahobe le lihlapi.

⁷⁹ 'Me le kajeno matšoele a joalo, bongata. Haeba mofolisi a le teng, khele, bao—bao ba Mo sala morao, 'me feela Ke feela—feelaa Ke qanthane. Haeba ba kula, ba matha, ho thoe, "Oh, na u ka nthapella hle, Morena Jesu a tle a mphekole?" 'Me hang feela ha ba etsoa kokelong, kapa ha ba theoha liphate tsa maloetse, ba khutlela hantle lefatšeng, joaloka ntja mahlatseng a eona, kapa kolobe seretseng sa eona, joaloka Lengolo ha le boletse. Ho Mo sala morao feela ho una molemo oa mofuta o itseng ho Eèna feela. Ba Mo sebelisa e le e—e lere la seiokotlelo feela, kapa—kapa ntho eo ba ka—ba ka e unang ho Eèna, feela ba sa lebella ho Mo sebeletsa. Letšoelle leo le sa ntse le tsoeletse kajeno.

⁸⁰ Ho kile ha folisoa balepera ba robong, ho khutlile a le mong ho Mo rorisa. Kapa na ba ne ba le leshome? Bao, e mong oa bona, o khutlile ho Mo rorisa, athe ba bang ba tsoelapele, ba sa lebohe.

⁸¹ 'Me haeba batho ba Amerika, ba folisitsoeng ke Matla a Molimo, ba ka sokollela lipelō tsa bona ho Molimo, ho ka tsoha tsoseletso sechabeng sena e ka koalang tamene e 'ngoe le e 'ngoe ea thitelo, e ka . . . Mavenkele a phuthelang le mavenkele a wiski a ka timela. Likereke li ka tlala. Litheathere li ka sala li le lephaka Sontaha bosiu. 'Me ho ka ropoha tsoseletso, ho phatlalla le sechaba sena. Empa ba e bona e etsahala, lintho tseo Molimo o li etsang, ba sa ntse ba hoeletsa, "Ke Mang Eo? Ke Mang enoa ea tlang?" Ebe ba tsoa kae? Enoa ke mang na? Ketso ena e etsoa ka matla afe?"

⁸² Le se lebale le ka mohla, mane Johannesburg, Afrika Boroa. Ke ne ke sa tsoa fihla, metsotsa e ka bang mashome a mararō pele ho moo, ka sefofane. Ke ne ke qetile matsatsi a mararo le masiu sepakapakeng, ke khathetse hakana ke batla ke sa khone ho e mamella. Ba—ba nkisa mabaleng teng ho phuthehile batho ba likete tse mashome a mahlano kapa tse mashome a tšeletseng. 'Me hang hoba ke hate kalana, eaba Moea o Halalelang . . . Ka bona, ho hlaha tulong eo, e—e bese. 'Me e ngotsoe letšoao le reng, "Durban." Ka bona mohlankana ea qabanang le ntate le 'mè eaba o a ba thobela, moomo o mong o le mokhutšoane ho o mong ka li-inchi tse tšeletseng kapa tse robeli. A apere hempe e tšoeu, borikhoe ba hae bo tšoeroe ke makurusepane. 'Me ka bona mohlankana eo. Ka boela ka sheba morao. Pono e ne e nyametse. 'Me eaba, motsotsong feela, ke bona Leseli leo le leketlile holim'a mohlankana, motšeo koana har'a letšoelle. 'Me ka sheba. Ka nahana, "Ke 'mone nqa e 'ngoe." Ka mo shebella, 'me Leseli leo la 'na la oka-oka holim'a hae metsotsa e 'maloa. 'Me ke emetse toloko ho tšoara mantsoe a latelang. Eaba ke bona eèna mohlankana eo a ema, a lahla melangoana ea hae e ikokotlelang, 'me moomo oa hae o mokhutšoane ka li-inchi tse tšeletseng oa boela oa lekana le o mong.

⁸³ 'Me ka re ho Mongh. A. J. Schoeman; ea leng Khanyeng, bosiung bona. Ka re, "Mongh. Schoeman, qotsa mantsoe a ka feela. Ke pono."

A re, "Hantle haholo."

⁸⁴ 'Me ka re, "Ka re mohlankana ea lutseng morao mane a apere hempe e tšoeu, u khoesitse makurusepane, o tsoile motseng o bitsoang Durban, o parotse naha limaele tse sekete le makholo a mahlano, ka bese. 'Me o ile a tlameha ho thobela ntatae le 'mè, ho tla. Empa o lumetse ho Morena Jesu, 'me moomo oa hae o mokhutšoane ho o mong ka li-inchi tse tšeletseng."

⁸⁵ 'Me mohlankana a qhoma. E ne e le eo, a eme, a ntse a leka ho phopholetsa melangoana eo a ikokotlelang ka eona. 'Me ka re, "Mohlankana, Morena Jesu o u folisitse." 'Me hang moomo oa saroloha ka li-inchi tse tšeletseng, oa boela setloaeling, oa lekana le o mong. 'Me ba tlisa mohlankana eo kalaneng, a hlahlobjoa ke lingaka mono. Le ka bona setšoantsa sa hae bukeng ea ka.

⁸⁶ Eaba ke eme mono nakoana e seng kae, ka bona nthoana, koloi e tala e theohang tseleng, ea thella. Ea jeka, morao, ea thula sefate. Mocha, ngoanana ea moriri o mosehla... o ne a robehile mokokotlo. 'Me ka re, "Ka re ke bona nthoana, koloi e tala e thella e kena sefateng, 'me ngoanana e mocha ea hlooho e tšebla a batlile ho ba lilemo tse leshome le metso e robeli o robehile mokokotlo. O maemong a nyarosang." Ha ho motho ea ileng a arabela. 'Me ha kea khona ho 'mona letšoeleng le batsi leo, le leholo la batho. 'Me ka ema mono metsotso e 'maloa. Ka re, "Ha ke utloisia. Ke... Le se ke la belaela. Ke Morena Jesu, ka Matla a tsoho. O rometse Moea o Halalelang ho ntšeletsa mosebetsi oa Hae pele." 'Me mono ka bona pono e boela e hlahla. 'Me feela ha ke a bona mosetsana eo.

⁸⁷ Lekhatheng leo, ho ne ho eme ka pele ho 'na, ke ha ho eme Leseli leo, joaloka ha le le bona setšoantsong. 'Me La ema mona. Ka nyolohela mono, eëna a robetse mono, tlas'a kalana. Ka re, "Mosetsana, Morena Jesu o u phekotse." 'Me a qala a lla.

⁸⁸ 'Mè oa hae a re, "Oh, che! U se ke ua mo laela ho ema!" Ho re, "Haeba a ka sisinyeha, o tla shoa."

⁸⁹ 'Me mosetsana a qhoma a ema ka maoto, a hoeelitse, a rorisa Molimo. 'Mè oa hae a akheha a oela liphateng tseo ngoanana a na robetse ho tsona.

E ne e le eng?

⁹⁰ Nakong eona eo, monyefoli e mong a phahama morao mane, a ema a beha leoto le leng setulong, le le leng holim'a se seng, a re, "Uena, Moamerika tooe! Ke u qholotsa ho mpolella Lebitso leo u entseng ketso ena ka lona! Le bolumeli ba kereke ea hao?" Le a bona?

⁹¹ Ho a itšoanelia feela. Ha ba utloisia. Ha ba shebella lintho tsena. Likereke ha li a shebella ho Khutla ha Morena. 'Me Moea

o Halalelang o teng mona ho thasisetsa ho Khutla ha Hae, ho E phethahatsa. Hakana hoo . . .

E mong le e mong o batla ho ikhethela tsela ea hae. Ho ne ho le joalo mono. Sehlopha ka seng se ne se tšoere mohopolo oa bona.

⁹² Empa eo ha se potso bosiusa bona. Ha se seo ke buang ka sona. Empa potso eo ke le botsang eona, ke ena, le nahana hore sena ke Eng? E batlana le uena. Ke Mang enoa ea nyolohelang holimo-le-tlase har'a lichaba? Ha se batho. Batho ba ka sitoa ho etsa lintho tse joalo. Ke Mang ea buang a ba a bolella batho ba har'a letšoelle, joaloka, “*Mona* ho lutse, ka *mona*,” le litulo tse fapaneng ka kōpanong, athe basali le banna ba kenngoa ka mona, ba eshoa? Ke Mang?

⁹³ Mosetsana eo ea keneng phaposing ea bokolobetso hoseng hona, liveke tse tharō tse fetileng, a bolaoa ke mofetše oa carcinomas, o lula hantle mona Maple Street, Mof. Baity. ‘Me ka botsa lingaka tse tharo tharō tse nang le eèna. A se na le monyetla o le mong ho phela, ka bana ba bane kapa ba bahlano, ‘mè oa ka a ntse a leka ho ba hlokomela. Mama o itse, “Bill, ha a sa tla khutlela lapeng hape.”

⁹⁴ ‘Me ka ea moo a leng teng, ‘me Morena Jesu a bua, “HO RIALO MORENA, haeba a ka ea kerekeng a tsepisa ho kolobetsoa ka Lebitso la Morena Jesu, ‘me a tla sebeletsa Molimo, o tla ea lapeng, a phetse.”

‘Me ka ‘motsa, “Na u tla etsa sena, leleiti?”

⁹⁵ ‘Me a re, “Sohle seo u se bolelang, ke tla se etsa.” Mahlaba a nyamela hang. Matsatsi a mararo hamorao, ke ha a le lapeng, ‘me lingaka ha li fumane le mohlala oa mofetše oo.

⁹⁶ Ke mang Enoa ea tlang ka Lebitso la Morena? Ebe Ke mang? Ke Moea o Halalelang oa Molimo. Le nahangan ka Eona? Monahano oa hao o reng, ka ho tseba molisa oa lóna? Athe litulong tsena mona ho lutse, batho ba tsoang ka ntle ho motse, ba lutse ka sethoathoa, ba lutse ka . . . Monna ke enoa o lutse, nqa e ‘ngoe ka mona, moena oa Mennonite, hantle mona, o tšoeroe ke sethoathoa. Ha ke e-so mo tsebe kapa ho ‘mona, le letho ka eèna. ‘Me hang feela, lilemo tse ka bang peli tse fetileng, ke a kholoa, kapa ho hong, yaa, lilemo tse peli, Moea o Halalelang o ile oa e bitsa, le ho re “HO RIALO MORENA.” Ha se e-so mo hlasele ho tloha mohlang oo. Ke Eng? Ke Eng?

⁹⁷ Mosali enoa o na a lutse mona, Sontaha se fetileng, khetlo la ka la ho qetela mona, a theohile ho tsoa nqa e ‘ngoe Illinois. Letsatsi le hlahlamang, o ne a metse hlahala e khōlō ‘meleng oa hae, e petlile. ‘Me bongaka bo tsoileng ka mahetla ba meriana ba Illinois bo tla mo isa tliliniking e khōlō, ho etsoa oporeishene, Mantaha. ‘Me a hatella ka matla a kena. Ke e-so ‘mone kapa ho utloela ka eèna, bophelong ba ka bohle. ‘Me hang feela, Moea o Halalelang oa mo khurumetsa, ‘me Ea ‘molella hoba e ne e le

mang, le moo a tsoang teng, 'me a tla etsoa oporeishene letsatsi le hlahlamang. Ba bakae ba neng ba le mona mohlang oo, ho bona seo? [Phutheho e re, "Amen."—Mohl.] Le ho bona litaba li phalla li khutla. Letsatsi le hlahlamang, ha a ea bona ngaka, ba mo tlosa tleiniking ho ea tleiniking, 'me ha ba fumana le mohlala oa eona.

⁹⁸ Enoa ke Mang na? Oh, Molimo hauhela hle! Enoa ke Mang ea etsang sena? Na le ka iteta sefuba la re e ne e le molisa oa lōna? Lekhale. Na le ka iteta sefuba la re batho ba amane le eona ka letho? Lekhale. Ke Moea o Halalelang, Moea o nong o lutse ho Morena oa rōna Jesu. Le ho Khutla ha Hae ho Ikōpanya le Kereke ea Hae, ho atametse hoo A hasang Leseli la Hae le leholo le halalelang, ho lopolla, le ho kenya setsoalleng, Kereke ea Molimo o phelang, bakeng sa Hloibilo e haufi. Amen!

⁹⁹ Enoa ke Mang? Ha ke khone ho araba potso ea hao. Nke ke ka u arabela. Empa 'na nka ikarabela. 'Me holim'a deseke e khethethileng ena, bosiung bona, litsebeng tsa bana, moifo, e leng—e leng theko ea Mali a Morena oa rōna Jesu, ke bua ho tsoa botebong ba pelō ea ka. E se hobane ke le e mong oa lōna, e se hobane ke le motho ea itseng ea fapaneng, empa e mong oa balopolloa ba hlatsoitsoeng ka Mali. Ke a lumela lona Leseli le leketlileng kahara kereke ena, bosiung bona, eèna eo Ea supang, ka tlhaho ea Eona, hore Ke Jesu Kreste, ka sebopheho sa Moea o Halalelang.

¹⁰⁰ Mang le mang ea tsebang Lengolo, o a tseba hobane Jesu o boletse, "Ke tsoa ho Molimo, 'me Ke khutlela ho Molimo." Pele A etsoa nama, mehleng eo 'moho le Moshe felleng, E ne e le Topallo ea Mollo. 'Me mohla Moshe a lakalitseng ho 'Mona, O fetisitse mekokotlo ea Hae pel'a hae. 'Me Moshe o itse, "E ka re Monna." Mehleng ea Hae mona lefatšeng, E ne e le Monna. O entse tsona lintho tseo A li etsang, kajeno, ka banna bao A ba lopolotseng. Ke eo A fihla le ho lumella setšoantšo sa Hae ho 'nkuoa. Ke eng? Ka morao ho lefu la Hae, kepelo le tsoho.

¹⁰¹ Pauluse tseleng ea hae ea Damaseka, ka letsatsi le leng, Leseli le leholo la mo otla la mo lahla fatše. Banna ba mo teetseng hare ha ba bona Leseli. Empa La otla Pauluse la mo lahla fatše, ho fihlela Le mo foulalitse. A ba le bothata ba mahlo bophelo bohole ba hae. 'Me o buile khetlo le leng, "E se re ka iphahamisa ka baka la tšenolo e khōlo, ke neiloe ke hona," phatsa nameng ea hae, lenqosa la Satane, le mo oahlelang. Ka lebaka la tšenolo e khōlō.

¹⁰² 'Me mohla Pauluse a na a liheloa fatše, tseleng ea hae e theohang ho ea hlorisa batho ba lerata haholo; sehlopha se tsoetsoeng labobeli, batho ba bitsitsoeng mahlanya. Pauluse o ne a kene tseleng ea hae ho hlorisa bao, ka lipampiri pataneng ea hae, ho ba tšoara le ho ba hulela Jerusalema. 'Me ha e batlie ho ba mpa ea letšehare, Leseli la chabela fatše, la mo otla la

mo phahamisa ka maoto, la mo lahla fatše, a oela lerōleng la lefatše. Puo ea utloahala e tsoa Leseling leo, e re, “Saule, Saule, u Ntlhorisetsa’ng na?”

¹⁰³ ’Me Saule a phethoha, bofotung ba hae, a lelala. ’Me o bone Leseli le leholo leo, le Khanyang. ’Me o itse, “U Mang na, Morena?”

¹⁰⁴ A re, “Ke ’Na Jesu. Ke tsoile ho Molimo; Ke khutletse ho Molimo. Ke tsoa ho Molimo; ke khutlela ho Molimo.” A re, “Ho thata ho uena ho raha litsenene.”

¹⁰⁵ Tšenolo e le ’ngoe litšeng tse khethethileng tseo, khetlo le le leng tulong eo, motho a ke ke a hlola a tšoana. Motho, le pele a ka ipitsa Mokreste, pele a iketsa setlama, o tlameha ho fuoa boiphihlelo boo ba motšeо ho lehoatata, moo a kōpaneng le Molimo, sefahleho le sefahleho.

¹⁰⁶ Hoba, kajeno, u ka fumana karabo ea mofuta ofe le ofe. U ka bona Morena a etsa hantle seo A boletseng ho se etsa, ’me baithuti ba masene ba thutabomolimo ba tla E pheula ka tlhaloso. Ba tla re, “E ne e etselitsoe letsatsi le leng. E ne e etselitsoe *sena*. Kapa, E etelitsoe mongoaha o mong. Kapa, E phoso.” Joalokaha ba buile ka Jesu, “Ke Belsebule, ke diabolosi. Ke senohe-ramahlohonolo.” Le lintho tseo tsohle, ba na le karabo.

¹⁰⁷ Empa motho ha a kile a kōpana le Kreste le ka mohla, le ho Mo bona joaloka Pauluse, kapa ho fumana boiphihlelo ba Hae, ha ho baithuti ba lekaneng ba thutabomolimo lefatšeng ba ka tlosang boiphihlelo boo ho motho ka tlhaloso.

¹⁰⁸ Ke ka lebaka leo, kajeno, ba se nang boiphihlelo. Ke ka hona ba ke keng ba re... bohole ba ntse ba re, “Enoa ke Mang na? Ebe Hoo keng? Ebe Se tsoa kae?” Ha ba na karabo. Hobaneng? Hobane, sohle seo ba se tsebang ke thutabomolimo e teiloeng ke kereke eo. E seng “ho tseba thutabomolimo” ke Bophelo. E seng “ho tseba Bibebe” ke Bophelo.

¹⁰⁹ Empa “ho Mo tseba” ke Bophelo. “Ho Mo tseba” joaloka Mopholosi oa hao, joaloka Eo Ea u tlatsitseng ka Boteng ba Hae. U ne u le teng mohla e ne e etsahala. Ha ho motho ea ka u amohang Eona. Ha ho motho ea ka u amohang Eona ka tlhaloso. Ha boiphihlelo boo bo u hlahela, u a Mo tseba na ke Mang. Ho ’na, Ke Jesu Kreste maobane, kajeno, le kamehla.

¹¹⁰ Ke Mang enoa ea etsang mehlolo ena? Ke Mang enoa ea etsang mesebetsi e meholo ena? Na ebe ke moreri? Na ebe ke Oral Roberts? Na ebe ke Billy Graham? Na ebe ke Jack Schuler? William Branham? E ka bang mang, ha ba amana le eona ka letho. Bao ke lisebelisoa.

¹¹¹ Ke Moea o Halalelang o hlahang o hlahisa Evangel, ka lipontšo le mehlolo le meeka, ho lōkisa batho. Sebaka se kasakasa litebello, tsa balumeli ba Mo lebeletseng ho hlaha.

¹¹² 'Me ba bang ba ntse ba re, "Hobaneng ho tšoaroa litsoseletso tsena tsohle? Hobaneng re li fumana? Ha re ituleleng fatše kerekeng." Khele, e builoe hantle kerekeng mona, ha thualo, mohla re ne re qala re haha kereke e ncha, ho itsoe, "Ha re hloke mehlolo. Ha re sa hloka lintho tsena hape. Ha u li batla tsoela ka ntle masimong, moo li etsahalang teng. Mona ha re li hloke." Mohla Branham Tabernakele e nyehlang hakaalo, e hohlometse.

¹¹³ Kereke ena e theiloe holim'a melaoana le Matla le Evangelie Jesu Kreste. 'Me mehleng eo tabernakele ena e sa ntseng e eme, Moea o Halalelang o khanyang o tla ithuela malulo meeng, ho pholosa, le ho tlatsa ka Moea o Halalelang, le ho folisa bakuli. Ho 'na, ke Jesu Kreste maobane, kajeno, le kamehla.

A re rapeleng.

¹¹⁴ Haeba u sa Mo tsebe na ke Mang, ha u tsebe na sena sohle se bolelang, 'me u rata ho tseba, na u ka etsa nthoana ea ho phahamisa letsoho la hao feela? Le ho re, ka ho phahamisa letsoho la hao, "Nthapelle, Moena Branham, hore ke tle ke Mo tsebe." 'Me Morena a le hlohonolofatse. Le bohole ka mahohle, ke bona matsoho a lōna.

¹¹⁵ Joale, Ntata rōna oa Leholidō, re hlahisa Molaetsa ona, le litholoana tsa batho ba phahamisang matsoho a bona, ba re ba rata ho tseba hoba Enoa ke Mang na. Ba ka rata ho amana le Jesu e moholo enoa. Ho re, ho Khutla ha Hae, hoa tsoho, ho atametse haholo, ebile bakuli ba qala ba folisoa. 'Me hoba hoo ho etsahale, eaba boporofeta bo kena Kerekeng, e ntoo ba lineo le mehlolo, joale ha ba ha fihla pontšo eo ea ho qetela. Ntho e hlahlamang e tlang ho hlaha, Hloibilo, Kereke e tla tlsoea e nkuoe. 'Me rōna, Morena, ba ipoletseng ba U tseba ka Matla a tsoho ea Hao, re shebeletse, re a lakatsa, re a lla, re a qela, "Tloo, Morena Jesu!"

¹¹⁶ Hloibila Kereke ea Hao ho E tlsoa, ka potlako, Morena. Hoba, kapele, banna ba se ba tla phatlola lefatše leo U le bopetseng bona ho phela ho lona, hobane ba hanne ho utloa Uena. Ha ba ka ba ithuta khotso, empa ntoa. Ha ba ka ba ithuta ho lōka, empa ba ithutile bolotsana. Kamoo ba neng ba sa tlo lapela matla bohole! Morena, lethebana leo le pelōng ea bona le ba lakatisang matla, ba ntse ba leka ho e khotsofatsa kahar'a labotori tsa bona nqa e 'ngoe, ho phatlola mohahabo.

¹¹⁷ Molimo, holane ba elelloa hobane matla ao ba a lakatsang ke Matla a tsoho a Mora oa Molimo, Matla a Moea o Halalelang ho fetola maphelo a bona; e seng ho phatlola lichaba, empa ho fetola maphelo a bona ho ba etsa basebeletsi ba Hao.

¹¹⁸ Batho ba bangata, ba futhang tjantjello e hlaha, ba re taka ba re bitsolla sekhakhatha sa "ba sa tsebeng letho," le—le joaloka "mahlanya," joaloka ha ba entse tšiung e qalang. Empa hoba ba khutle, ba nyakaletse, ba U leboha ka hobane ba khonne ho jara sekhobo sa Lebitso la Hao. Ke ona maikutlo a arubetsang bana ba Hao, bosiung bona, Morena, hohle. Re mpa re thabile feela.

¹¹⁹ Ba bang ba lekile ho U hlopholla letsatsing la Hao. Ba itse, “Ke motsoalle oa monna ea hlaha eo, Johanne, ea tsoileng nahathote a batla a sa apara liaparo, ha e se letloalo la nku le mo thatetseng. Monna ea hlaha ea lahletseng mantsoe, bochabela le bophirimela, le ho re, ‘Selepe se behiloe motsong oa sefate.’” Ha thoe, “Ke e—e molateli oa hae. Ke monna ea hlaha. O a hlanya. O lahlehetsoe ke kelello ea Hae.” Molaetsa oa Hao o nong o le mohlololo, oho Morena, o foufalitse mahlo a bao.

¹²⁰ ’Me le kajeno E entse joalo. Moea o Halalelang o moholo ona o lelekelang ho Khutla ha Morena, joaloka Johanne ha a entse letsatsing la hae, ho foufatsa batho, nqa bao ba sa batleng ho bona. Empa ho bao ba batlang ho bona, U ba khethile. “’Me bohole ba Ntate a ’Neileng bona ba tla tla ho ’Na,” U itse, “’me ha le a mong ea tla timela har’ a bona. ’Me Ke tla mo tsosa ka letsatsi la ho qetela.” Re U leboha ka sena.

¹²¹ ’Me bao ba phahamisitseng matsoho a bona, bosiusng bona, re a rapela, oho Morena Molimo, hoba U tla Itsebisa bona, ka boiphihlelo, ka Matla a tsoho. Aba sena, Morena.

¹²² ’Me ba bang ba ka ba teng mona, ba sa phahamisang letsoho la bona, empa koana, pelōng ea bona, ba tsebile hobane ba e hloka. Ke Ú tla rapela ho ba hlohonolofatsa, le ho ba neha takatso ea pelō ea bona.

¹²³ Ha re tloha mohahong ona, bosiusng bona, re tlohe re le batho ba fapaneng. Re tlohe ka morero o fapanang le oa pele, ha ne re kena, haeba o ne o le khahlano le thato ea Hao e Khethehileng. Re tsoe ka maikemisetso a ho tsoara linaka tsa aletare, ho fihlela meeaa ea rōna e khotsofetse hore re fuoe boiphihlelo le Uena, ’me re tseba Eo re buang ka eēna, hobane re kōpane le Eēna ’me re a Mo tseba, ’me re na le setsoalle le Eēna. Aba lintho tsena, Ntate. Folisa bakuli le bahlomohi.

¹²⁴ Hlohonolofatsa molisa oa rōna ea ratehang ea theko e thata. Molimo, re U rapela ho ba le eēna le likhaitseli tsa hae tse ratoang, ba sa ntse ba bina Evangelii, ’me ba E rera radiong ea bona.

¹²⁵ Hlohonolofatsa baeti ba menyako ea rōna. Morena, ba ke ba tsoe, bosiusng bona, ka phethoho pelōng ea bona, le ka morero o reng bona, ho qala lihoreng tsena ho ea pele, haeba ba sa u tsebe ’me ba e-so U sebeletse, pele, ba ke ba U sebeletse. Ba ntse ba tseba sena, ho re, “Lintho tsohle e tla ba lefeela, empa Lentsoe la Morena le tla sala kamehla.” Aba sena, Ntate.

¹²⁶ Re tsoarele bohole, libe tsa rōna. ’Me re ke re kōpane nthong e khōlō eo . . . [Sekheo lebanteng—Mohl.]

Hoba A nthatile pele
Le ho lefella poloko ea ka
'Fateng sa Kalvari.

¹²⁷ Joale, ka morao ho Molaetsa, ha re inamiseng lihlooho tsa rōna re Mo rorise, re sa Mo binela.

Ke a Mo rata, (ka pelō eohle ea lōna) ke a Mo
rata
Hoba A nthatile pele
Le ho lefella poloko ea ka
'Fateng sa Kalvari.

¹²⁸ Ba Mo ratang ba tiile ba ba kae? Phahamisa letsoho la hao, paka taba ena, "Ke a Mo rata." Oh, na ha A babatsehe? [Phutheho e re, "Amen."—Mohl.] Le a tseba, ke rata ho lula ka mokhoa ona feela le ho noa, ka mokhoa o itseng, Boteng ba Hae. Lentsoe la Hae, le tsoile, Le oetse lipelōng. Le a re lōkisa. Le re beha tlasa bolaoli ba Moea oa Hae. Ke monate O mokakang ho Mo rapela! Joale, ha le tloha kerekeng ena, bosiusing bona, e-eang, le ntse le Mo rapela.

¹²⁹ 'Me le hopole, vekeng ena, tšebeletso ea thapelo e tšoletse mona Laboraro bosiu. Le se ke la lebala khaso ea Moena Neville ka Sontaha, kapa ka Moqebelo, hora ea borobong, koana WLRP. Ke rata feela ho ba mamela, lōna? K'hothete, kapa trio, e bina ha monate. Mohatsa le 'na, le bana, re bokana bohole re ntša radio e nyenyane 'me—'me re e hloa setha, ho mamela Moena Neville le khaso ea hae, le mantsoe a hae a babatsehang, kamoo a phahamisang Molimo oo a mo ratang 'me a o lumela. Ha ke e bue ho . . .

¹³⁰ Lōna baeti ba mona, ha le se na kereke ea lehae, tloong le ikōpanye le rōna. Ke a le bolella, ha ke e bue hobane a lutse mona. Che, monghali. Ke e buile, khafetsa. Ke rata Moena Neville. Taba ena, pele, ke mothuthi oa thutabomolimo. Taba ea pele, ke ngoana oa Molimo. Taba e latelang, o a tšoana letsatsi ka leng. Ke mo tsebile lilemo. Ha a e-so fetohe, le hanyenyane. E sa ntse e le Orman Neville, mohlanka oa Morena Jesu. 'Me ke nahana hobane o na le . . .

¹³¹ Bosiu bo bong, ke letsitse, ho mo kōpa haeba a ke ke a khona, lenaneong la hae, ho re hlekela sebaka ho theoha le ho rapella bakuli. Ba bang ba ne ba kena, hoseng hona, le a tseba. Eaba mohatsae e monyenyane o arabela mohala, 'me ke ntse ke qoqa le mohatsa ka, morao mane, ka eona.

¹³² 'Me re hlile re leboha Molimo ka mohatsae e monyenyane le ka lelapa la hae. Ke hantle haholo. Ha u bona moreri le mohatsae ba khema 'moho joalo, ka mosa le ka boikokobetso, hoo ho etsa hore kereke le eona e tsamaee hantle ho feta. Lintho li natefala ha matsatsi a ntse a feta.

¹³³ Na le Mo rata ka pelō eohle ea lōna? [Phutheho e re, "Amen."—Mohl.] Ke hantle. Re bina sefela se re qhalanyang, *Inkele Lebitso La Jesu*. Re fe lehlaso, khaitseli, haeba u se tšoere mono bukeng. 'Me re tllil'o bina sefela sena sa rōna se re qhalang.

'Me ha re bina temana ea pele, re batla ho retoloha, re tsukutlane le ba bang ka matsoho. Ke hantle. Re fe lehlaso leo.

. . . Lebitso la Jesu,
Ngoana masoabi le tlokotsi;
Le tla u thabisa le u tšelise,
Le nke hohle moo u eang teng.
Lebitso le ratoang, oho le monate!
Tšepe ea lefatše le thabo ea Leholidō;

Molimo a u hlohonolofatse, moena.

Lebitso le ratoang, oho le monate!
Tšepe ea lefatše le thabo ea Leholidō.

Ha re nkeng temana ena joale.

'Bitsong la Jesu ba inama,
Ba namalla maotong a Hae,
Khosi ea likhosi Leholidōng re tla Mo tlotla,
Ha eto la rōna le feticile.

Na ho ke ke ha babatseha?

Le ratoang, Lebitso le ratoang, oho le monate!
Tšepe ea lefatše le thabo ea Leholidō;
Lebitso le ratoang, (Lebitso le ratoang) oho le
monate!
Tšepe ea lefatše le thabo ea . . .

¹³⁴ Ba hopolang sefelana sa rōna sa mehleng ba ba kae, *Se Lebale Thapelo Ea Lelapa?* Le sa se hopola na? Ha ke . . . Thelma, haeba u se tseba, kapa lehlaso, kapa che? Ha re se lekeng hang. Ha le se hopole na? A re . . . Mohlomong nka se leka le lōna 'moho.

Se lebale thapelo ea lelapa,
Jesu o batla ho kōpana le uena;
O tla u baballa ka hohle,
Oh, se lebale thapelo ea lelapa.

¹³⁵ Ba tšoarang thapelo ea lelapa ba ba kae? Ke botle. Ha re se lekeng hape. Ke tla e khutlisetsa hantle ka mona. Ke rata seo. 'Moho joale.

Se—se lebale thapelo ea lelapa,
Jesu o batla ho kōpana le uena;
O tla u baballa ka hohle,
Oh, se lebale thapelo ea lelapa.

¹³⁶ Oho Morena, ho ngoliloe Mangolong, ho thoe ba nkile masela le liaporone tse amileng 'mele oa Pauluse, 'me meeā e litšila ea tsoa bathong, 'me maloetse a folisoa. Re a rapela, oho Morena, ka mokhoa o tšoanang, e ke e bonahatsoe holim'a bana, bosius bona, ha ke a romella ba hlokang le ba kulang. Ka ntle mafatšeng kae-kae, motho o eme 'me o shebeletse sena ho etsahala. Ke a rapela, Ntate, U tle u e abe ka Lebitso la Jesu, Mora oa Hao. Amen.

¹³⁷ Joale ke tla kōpa, re sa inamisa lihlooho tsa rōna, ha Moena Smith oa rōna ea thekothata mane, ho tsoa ho kereke ea Molimo, eo re mo fumaneng, joaloka Moena Neville oa rōna mona, e le motšepehi, morapeli, mohlanka oa Molimo. Ke tla mo kōpa ho le kōpela mahlohonolo, ho tsoelapele vekeng ena. Molimo a le hlohonofatse, ho fihlela re kōpana le lōna hape.

¹³⁸ Moena Smith. [Moena Smith o a rapela—Mohl.] E, Morena. E. E. E. Amen.

¹³⁹ Tsukutlanang ka matsoho. Le amohetsoe hape, ho tla tabernakeleng. Molimo a le hlohonolofatse. 

ENOA KE MANG NA? SST59-0510E
(Who Is This?)

Molaetsa ona ka Moena William Marrion Branham o reriloe sethatong ka Senyesemane ka Letsatsi La 'Mè, Sontaha mantsiboea, Motšeanong 10, 1959, Branham Tabernakel, Jeffersonville, Indiana, U.S.A. o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2019 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org